



Reglar for orden og åtferd ved Stokksund skule

Reglane for orden og åtferd ved Stokksund skule er heimla i Opplæringslova §§2-9, 2-10 og 9a, Forvaltningslova §§37 og 38, samt Skadeerstatningslova §1-2.

Reglane byggjer elles på Utdanningsdirektoratet sine retningsliner for ordens- og åtferdsreglar, samt Herøy kommune si «Forskrift for orden og åtferd i Herøyskulen».

Reglane gjeld i skuletida. Skuleveg, skuleskyss, ekskursjonar, elevkveldar og all anna deltaking på skulearrangement, utanom vanleg undervisningstid, er også skuletid.

Stokksund skule skal vere ein god stad å vere og ein god stad å lære. For at det skal vere slik, må vi heile tida løfte fram formål som læring, tryggleik, trivsel, respekt og likeverd. Skal vi lukkast med dette, treng vi også klare reglar for orden og åtferd.

Orden

Ved Stokksund skule er det god orden når du:

- ***bidreg til arbeidsro i timane og viser respekt for undervisninga.*** Den vaksne bestemmer. Klassene kan, i tillegg, også ha sine egne klasseromsreglar.
- ***møter presis, har orden i skulesakene og har med naudsynte læremidlar og utstyr. Lekser og innleveringar skal vere gjort til rett tid.*** Dersom ein ikkje greier dette, skal skulen ha melding frå føresette i Edlevo.
- ***ved/etter fråvær leverer melding om årsak og lengd på fråværet.*** Ved ulovleg fråvær skal dei føresette få melding om det, og det kan føre til nedsett karakter i orden/åtferd. Alt fråvær vert ført på vitnemålet med unntak av fråvær etter forskrift til Opplæringslova, §3-41.
- ***let vere å bruke tobakk, snus eller andre rusmidlar i skuletida.*** Det same gjeld godteri, som t.d. snop, brus og energidrikk, men her kan dei tilsette gjere unntak ved elevkveldar, avslutningar og liknande.
- ***let kniv, lighterar, våpen eller våpenliknande og andre farlege gjenstandar ligge att heime.***
- ***har mobiltelefonen, smartklokker o.l. i mobilhotellet i skuletida.*** Avtalar om naudsynt bruk kan gjerast med dei vaksne ved skulen. Datautstyr vert nytta i samsvar med kontrakt for bruk av IKT-hjelpemiddel ved skulen.
- ***held deg innanfor skulen sitt område i skuletida.***

Åtferd

Ved Stokksund skule viser du god åtferd når du:

- **er mot andre som du vil andre skal vere mot deg.** For elevar og tilsette er respekt, toleranse, inkludering og omsorg viktig. På Stokksund skule krenkjer vi ikkje kvarandre. Med det meiner vi t.d. mobbing, vald, rasistiske utsegner/handlingar, nettmobbing, ta bilete og video av andre utan samtykke, deling av bilete og video utan samtykke, seksuell trakassering, sjikane på grunn av religion og livssyn eller plaging av anna slag. Stokksund skule følgjer dei 5 delpliktene i aktivitetsplikta i Opplæringslova kap. 9a, i saker der eleven sin rett til eit trygt skulemiljø kan vere trua.

- **avstår frå stygg ordbruk**

- **fer fint åt med inventar og materiell, og hjelper til med å halde skulen ryddig.** Den som øydelegg noko med uvørden framferd, kan bli sett til å rydde opp etter seg, erstatte eller utbetre skadane. Ved skuld i skade kan føresette/elev ha eit erstatningsansvar på inntil kr. 5000,- (jf. Skadeerstatningslova § 1–2).

- **held deg for god til å fuske i alt skulearbeid.** Om du fuskar vil du stå i fare for å ikkje få vurdert arbeidet du har gjort, og kan bli sett til anna skulearbeid i tida som står att av økta.

Sanksjonar for brot på reglane kan vere:

- munnleg åtvaring frå tilsette ved skulen
- munnleg/skriftleg påtale og merknad i protokoll
- inndraging av gjenstandar
- kontakt med føresette
- brev heim
- attsitting
- bortvisning frå gruppa for resten av timen/arbeidsperioden. Rektor kan vise bort eleven for resten av skuledagen og inntil tre dagar
- avgrensingar av område eleven kan opphalde seg på, kven eleven kan opphalde seg saman med
- skifte av gruppe, klasse eller skule
- rådføring med/melding til politiet

Alle sanksjonar kan få konsekvensar for karakter i orden og/eller åtferd

Skulen viser elles til Konsekvenstrappa, der alvorsgraden av brot på reglane og konsekvensane av det, kjem fram, samt vurderingskriterier for orden og åtferd. Reglar for orden og åtferd ved Stokksund skule har vore til høyring i kollegiet, elevrådet, FAU og vart endeleg godkjent i Samarbeidsutvalet – SU 14.06.2022.

Tore Tangen

- rektor-